

皇  
明  
疏  
鈔

皇朝欽定卷之十一

好尚

奏止齋醮進香疏

張寧

臣聞釋道之教遠古所無下至漢唐其法寔盛然三代君王壽考世運靈長後世衰亂相仍年祚少永佛老無補視昔可知夫父子君臣夫婦兄弟朋友五者人之大倫自古體國立法修政建事無非為此五者而為之經理防範耳五者順序百慶以寧是以聖人之道始於有為而終於無為彼佛老之法不足以有為而強於無為遂欲去君臣廢夫婦一切歸諸虛無寂滅假使其教盡行則婚姻既無生育頓絕不過百

年人類盡矣雖有事物將誰用之歷代英君誼辟有  
見於此非不欲深惡而痛革之特以其頗能以禍福  
輪迴之空談警動於人可以化導愚昧姑將存之以  
爲治化之外一術耳非謂其能扶世立教延永國  
步而爲之崇奉也恭惟 皇上曩在清宮繼登大寶  
夙精儒學日御經筵於凡治亂之由正邪之辨洞明  
深識允蹈躬行當卽位之初詔天下寺觀不許葺匿  
無度牒僧道等項尋奉 睿旨不許增修寺觀乞請  
額名上書言事者又每以濫度僧道教化不便爲詞  
多被獎納傳之將來固當永遠無弊矣邇者恭遇  
皇太后誕日令僧道建設齋醮此見 皇上崇教

揚孝道慰悅聖慈無所不用其極之心也諸大  
百職事但當和衷協德仰贊至情上綏懿祉則心  
道得允合舊章而禮部尚書姚夔等乃於各衙門  
會財物收辦炷香約以至期赴壇行禮為儒者自失  
其守業彼者烏知其非臣雖至愚為此深惜切惟人  
臣之於君願其福也則當勸以修德善願其壽也則  
當勸以去逸慾願天心之順也則當相之以和保小  
民康濟四海故曰求福不回天壽平格又曰欲王以  
小民受天永命未聞有以禱祠得福丹藥致壽假符  
瑞以永天命者今乃不能盡所當為徒以辨香尺楮  
列名其上宣揚於佛老之神相率而拜曰為朝廷祈

福祝壽天地鬼神山川河嶽昭布森列可厚誣如是  
哉昔孔子之於異端孟子之於楊墨韓愈歐陽修諸  
儒之於佛老為其惑世誣民充塞仁義故辭而闕之  
論而排之今若此其流不止於惑與誣矣通朝之人  
靡然相從仁義不止於充塞矣學聖賢之學者既不  
能闕而排之又不能以正自處天下後世謂之何哉  
伏惟英宗睿皇帝當復位之初國事多虞屬有是  
疾其時一二大臣所見不遠不察古人行禱之意故  
嘗舉行此事蓋一時臣子迫切至情事不得已然非  
祖宗之舊典先帝之本心也因循至今實意不存  
而沿故習夫臣之於君猶子之於父一指一髮之

長養一飲一食皆其賜予若能以齋醮助國難  
亦所不辭豈敢自以儒者門戶為此倔強與彼  
量哉但以無益事情徒傷大體其於經筵聖學不無  
略有所干其於進講儒臣亦恐難以身勸伏望 皇  
上法古昔聖賢正常道之心監大學衍義明道術之  
語乞 勅禮部及文武衙門今後凡遇慶賀日期等  
項不許擅備炷香於寺觀行禮庶可以扶名教振士  
風全一代之治體而與三代之時並隆矣臣等待罪  
言官不敢緘默誠惶誠懼謹題以 聞

乞停遣使西域疏

毛紀

切照烏思藏地方僻在西陲數萬里之外其地習俗

鄙惡語言侏離與中國懸絕中國之人亦鮮有至其地者祖宗之時番僧雖嘗入貢賜以法王國師等號不過因而命之空名虛秩居其本土藉以撫化番衆使無擾我邊境而已非崇信其教留居中國令入禁內如前代之事佛求福者比也前代事佛求福更得禍史冊載之可為萬世之明鑑仰惟陛下聖仁神武天縱聰明曩在春宮懋學毓德繼膺寶祚仁賢圖治天下之人拭目延頸以望太平今無故而為此舉朝野聞之咸加駭異以為堂堂天朝衣冠文物之區道德綱常之化而顧從事於夷狄之陋哉且異端邪說人人皆知其非聖明在上詎肯信之乎

知此非出於 陛下之本意也實由番徒造爲一切  
妄怪誕之說上瀆 聖聰 陛下偶爾聽之不計  
其累一至於此况本夷年例進貢自有舊定常格差  
遣伴送亦有通事人員揆之事體似不可以煩 朝  
廷近臣之往番供送也雖曰 先朝嘗有此例當時  
庶政修舉教化大行海內富庶百姓安樂偶一行之  
亦不甚損卽今各處災異頻仍人民困苦盜賊生發  
虜寇猖獗兵戈相尋未已倉庫所在空虛而四川等  
處腹裏之患甫平松潘之警繼至瘡痍滿目呻吟滿  
耳地方之疲敝極矣當此之時正宜勞心竭力多方  
拯濟猶恐弗及尚忍復有此騷擾煩費之舉哉昔漢



皇明金鑑 卷之十一 四  
光武閉玉關以謝西域之質千古稱之以爲美談夫  
光武七制之賢君也而况不爲光武者乎伏望 陛  
下俯察愚忠收回成命以彰乾剛之斷離照之明使  
天下後世稱爲堯舜之聖實臣等之至願也

速停齋醮以光

聖德疏

楊廷和

竊惟人君一身天下根本欲令出入起居事事盡善  
惟在左右前後皆用正人日聞正言日行正道則奸  
佞之徒不須斥逐自然遠去異端邪妄之說何從而  
生臣等先於正德十六年四月初間已嘗具疏請於  
聖明慈壽皇太后乞 命司禮監官將尚冠尚衣等  
四執事及膳房茶房殿內答應堂官侍衛等項

人員一一揀選老成重厚慎重小心之人以侍 陛  
下任使其曾經 先朝隨侍壞事人員不許濫與卽  
蒙 懿旨施行暨 陛下登極之初臣等又嘗極言  
異端邪說瀆經亂倫傷風敗俗亟宜痛絕又條奏慎  
始修德十二事寫成牌扁懸置殿壁其一事謂齋醮  
禳禱必須豫絕其端不可輕信不意近來無故不時  
修設齋醮 恩寵賞賚過於尋常遠近傳聞莫不驚  
駭推求其故皆因先年壞事之徒各名下掌家管家  
等項人員計引番漢僧道人等巧言誑惑以致 陛  
下不察誤蒙信用各該名下人員從來壞事非止一  
端於今日猶以齋醮一事試探 聖心夫齋醮之事

乃異端邪說誑惑時俗假此名目以為衣食之計佛  
家三寶道家三清名雖不同其實同一虛誕誣罔聖  
王之所必禁在昔梁武帝宋徽宗崇信尊奉無所不  
至一則饑死臺城一則累繫金虜廟社丘墟生靈塗  
炭求福未得反以召禍史冊所載其跡甚明若使二  
君當時左右隨侍皆得正人何至受禍如此哉二君  
且未暇詳論如近日劉瑾建玄明宮錢寧建石經山  
祠張雄建慧光寺張銳建壽昌寺于經建碧雲寺張  
忠建隆恩宮所費金銀不可勝計其心本欲求福也  
然皆身被誅竄家抵敗亡畧不蒙佛與天尊之庇佑  
由此觀之則其不足信也明矣夫何說邪小人公肆

眩惑不遵

祖宗法度不畏天下議論至使宮中

內修設齋醮

萬乘之尊親蒞壇場上惑

宸聽下

詭愚俗以為福田可種利益可求災害可除祥瑞可

致不知年來遠近亢旱風靈災變彼何不誦一經念

一咒以消弭之乎南北直隸山東河南流賊往來焚

劫殺戮彼何不驅神兵役鬼將以掃平之乎陛下

試以此驗之則其無益有損不待辯矣况陛下親

蒞壇場行香拜錄亦甚勞矣何不移之以御講筵

修齋設醮糜費錢糧亦甚多矣何不移之以周窮困

蓋正道異端不容竝立心既繫於彼則必不繫於此

邪說既入則聖賢之經訓自踈播之天下傳之萬方

其爲此陛下聖德之累不小非止虧損聖德耗  
民財而已臣等職在輔導陳善閉邪培養君德分  
所當然第以積誠未至言雖諄諄未蒙嘉納今不得  
已形之章奏揚言於廷以爲不如是則不足以聳  
動天聽故不避干犯率爾上塵伏望聖明亟納  
臣言特命司禮監官將前項有名蠱惑誘引人員  
逐一查出先將首惡從重究治其餘脅緣阿附者  
數斥逐不使仍前隨侍再命禮部查訪在外寺觀  
同惡相濟表裏售姦僧道一體治罪又命光祿寺  
備查近來每次齋醮取用過米麵菜果等數又命  
內庫查報各該人員賞過襯施銀兩等物各開

呈究問追奪以杜冒濫更乞大施乾斷於凡無益齋醮一切停免惟日以敬 天法 祖修德保身為先務則 聖治益隆 聖壽自延而 聖德愈光所以綿 國祚於千萬年而無疆者端有在於是矣

扶植國本疏

林俊

臣惟人君之德莫大於聽納臣子之罪莫加於欺罔近年以來災異迭興兩京地震 陵寢搖動日月繼食野熊入禁鑒戒之昭莫此為甚而醜虜陸梁犯我北鄙邊氓騷擾戍卒咨怨誠不可不為之慮也臣愚謂此尚手足之疾耳陝西山西河南連年饑荒陝西尤甚人民流徙別郡及荆襄等處日數萬計甚者闔

縣無人可者十去七八倉廩懸罄拯救無法樹皮草根食取已竭饑荒填路惡氣薰天道路聞之莫不流涕而巡撫巡按三司等官肉食彼土既知荒旱自當先期奏聞伏候 聖裁顧乃茫然無知愆不加意勢至若此尚猶顧盼徘徊專事蒙蔽視民饑饉而不恤輕國重地而不言夫物極則變草澤之中禍深難測此誠腹心危急之疾治之當如拯焚救溺不可少緩者也乃者大學士萬安等具言將生員人等納米是固救荒之一策然此等欲事輕賈則彼地空乏買米無從欲他方轉運則困於刼掠道里難進臣恐緩不及事為今之計宜下寬恤之 詔重歎罔之罪

人心卽遣才力大臣拜科道部屬廉能等官分贖

帑帑之財星馳前往臨清等處聽其地里近便有運  
到官糧或隣封積蓄官為雇車裝運兼程以行隨在  
賑濟則未死之餘民猶或及濟然臣又有說焉孟軻  
有云死我所惡所惡有甚於死者故患有所不避也  
臣說一行則可洩天地神人之憤快 聖祖神宗之  
心彰 陛下為明聖聽納之主奠萬億斯年無疆之  
休萬一忤旨禍止臣一身耳何惜一身之禍不為

陛下陳之臣聞修養之說恠誕無徵佛老之教幻妄  
無取故其事不見於堯舜禹湯之世其誣每見於唐  
宋儒先之論史冊所稽不可泯也謹按僧繼曉本一



儉險小人市井無賴曩者猥指邪術欺誑楚府及至  
事敗挨拿却乃竄身逃罪不圖自新益加縱誕潛住  
京師多方夤緣誣蒙 聖眷疊賜異恩五尺兒童切  
齒唾罵敢復肆無忌憚惑亂 聖聰發 內庫銀數  
十萬兩蓋大鎮國永昌寺臣細思之 陛下聰明齊  
聖斷不爲此是必繼曉小人倡為誕說謂此寺一建  
則 聖壽益綿 國祚益昌民命益永邊疆益寧以  
此啗 陛下耳曾不知以可用之財供無益之費國  
計且日削矣以 陛下超三邁五之資蹈唐憲梁武  
之轍 聖譽且日損矣下人師師爭先慕倖 聖政  
三日壞矣居民重遷工役不息人怨且甚矣夫縱

曉之言先王之政斷不為此况萬無是理顧有大  
害者哉昔衛懿公好鶴鶴有乘軒者將戰國人受甲  
者皆曰使鶴鶴實有祿位予焉能戰夫鶴之好似若  
未害其失人尚若此伏望 陛下以類推之臣謂不  
斬繼曉異日之禍未可言也然縱之者梁芳也梁芳  
傾覆陰狠引用邪佞排斥忠良輔之者驟得美官觸  
之者動遭竄逐欺罔如趙高奢侈如石崇數年之間  
假以進貢買辦為名盜 祖宗百餘年之府藏殆盡  
家貲山積尚名不足所在風擾汪直莫能過乃復荐  
進繼曉陰求蓋寺虛耗內財飛語外聞謂其立意不  
肯為是被 陛下逼脇只得屈從是畏天下議已欲

陛下專擅謗耳夫臣善則稱君過則歸己今梁芳欲  
文已奸而以過歸陛下卽此一事已不容於誅矣  
且天下猶身也賢才元氣財用骨肉小人疾病也梁  
芳耗元氣削骨肉而引之以疾病臣竊為身危之斷  
謂粉梁芳之身不足償其罪之萬一耳臣德不足信  
職非言官熟視默默可以保位顧乃不自揣量與此  
二權奸臣抗可否是猶螭觸山蛾赴火已不可言智  
矣然臣惟牛司耕犬司守走獸之微亦以勞而食也  
臣食於陛下且七年矣近以年勞復蒙增秩感愧  
無地中夜以思涕淚交流謂人主深居九重利害豈  
盡知而祖宗在天之靈亦望臣等以言進於

陛下之令內而大臣外而百官以及閭井之民  
痛心歛食梁薪繼曉之肉卒之不敢以此言進於  
陛下者所惜者官所畏者死耳使臣復不言則陛  
下終不悟 祖宗在天謂臣等何如人天下後世謂  
臣等何如人秉筆史官必譏笑臣等恐將及 陛下  
矣惟 陛下留神聽覽熟計而必行之幸甚

黜異端以隆 聖治疏

屠儔

邇者道路傳言 宮闈之中不時脩齋醮或於 乾  
清宮或於 坤寧宮或於 清寧宮或於 仁壽宮  
或於 五花東次等宮殿皆名為好事或一永日或  
三晝夜或間日一舉或一日再舉令光祿寺買辦素

物費用錢根不可數計皆太監崔文主領其事名為  
高公督率畝漢經廠僧道人等導引 陛下親蒞壇  
場行香拜錄又先年壞事張銳等各名下管家等項  
人員復已環侍左右相扇誘引以為此事臣等聞之  
不勝駭愕切意傳聞之言未足憑信及本月初六日  
通報大學士楊廷和等奏為慎選左右速傳齋醮以  
光 聖德事奉 聖旨覽卿等所言具見忠愛朕已  
知道了欽此臣等始信人言之不為虛傳而 宮闈  
禁密之地有所不為為之則難掩蔽於外如此仰窺  
聖明益深駭愕是豈 陛下今日之所宜有者乎今  
韓臣既以為言即宜明示罷革乃復泛然 杜塞

獎以忠愛之言而不見聽受之實徒諉於知道之  
而不能行其所知果何為者乎夫齋醮之設不過曰  
祈天永命耳為崔文輩者亦以為非此則無以搖動  
陛下之心此正自古小人巧意以中人主之欲之謀  
也陛下不察遂傾心於此輩之導引委身於佛老  
之下風屈天子萬乘之尊為下民匍匐之拜是豈真  
以其術為可以祈天永命而行之不諱乎臣等請得  
而論之佛老之教異端也非吾聖人之所為道也供  
奉之惑自古有之然每不聞有福利之報而皆得奇  
異之禍如秦始皇嘗求長生不死矣不免沙丘之隕  
落漢武帝拜文成五利矣卒致海內之虛耗明帝繪

佛於清涼靈帝奉祠於宮中漢業之衰迄今為慨其  
他如梁武帝謹於事佛豐於舍施不救臺城之餓宋  
徽宗勤於奉道厚於設醮無補漠北之辱楚王英敬  
信沙門而受誅夷者卒以佛法也符堅崇重道安而  
被縊殺者卒在佛寺也此佛老之教之不可為而供  
奉齋醮之不足恃其明鑑如此 陛下當中興圖治  
之初正學問方新之日博觀前代史籍獨不能究其  
邪正利害之所歸而顧乃傾信於儉邪之蠱惑以甘  
心乎夫求福利者道莫大乎崇正圖永終者事莫要  
於慎始 陛下之心固非止欲永一身之命亦以為  
祖宗社稷億萬年之圖也但古人已覆之轍不可不

蹈而吾聖人悠久之道自有可行此臣等所以  
陛下之初心獨不在彼而在此也嘗讀論語有曰仁  
者壽讀中庸有曰故大德必得其位必得其祿必得  
其名必得其壽又嘗伏讀 皇明政要 太祖卻道  
書之獻有曰彼所獻書非存神固氣之道即煉丹燒  
藥之說朕焉用此朕所用者聖賢之道所需者治人  
之術將濟天下生民於壽域豈獨一己之長生久視  
哉斥之母為所惑 太宗却道士獻經者有曰朕所  
用治天下者五經耳道經何用斥去之既而諭侍臣  
曰人主好尚稍不動檢人懷僥倖之心者恣肆妄誕  
以投所好苟墮其計將來流毒無窮矣 宣宗斥欲



化緣脩寺祝壽者有曰人情莫不欲壽古之人君若  
商中宗高宗祖甲周文王皆享國綿遠其時豈有僧  
道豈有神仙之說秦皇漢武求神仙梁武帝事佛宋  
徽宗崇道效驗可見矣世之人終不悟甚可嘆也凡  
此皆吾聖人正道之所在夫論語中庸之言 陛下  
於經筵講之熟矣其曰仁者則有天理自然之安而  
無人欲陷溺之危若聖帝明王皆仁者也脩身體道  
朝廷日近乎儒髦寡欲清心後宮不濫於女色自然  
心廣體胖神完氣固而壽不難致也其曰大德蓋指  
虞舜有聖人之德盡為君之道好問以廣天下之言  
好察以盡萬民之善明四目而用衆人之視以為

來人之聽以為聽故能克享天心

厚而祿位名壽之並全也若是者何嘗有取於

老之齋醮乎至我太祖太宗宣宗聖諭所及

又陛下於傳受而得之真者矣其曰聖賢之道與

五經之用亦皆不外乎正心脩身擗情節欲親君子

遠小人斥奸佞納忠諫不離正學不尚無益詭然為

保邦之要圖延祚之至理及商宗之懼妖而修德遇

災而聽言重交修於輔相監成憲於先王周王之穆

穆以望道學不懈於緝熙翼翼以宅心身常安于敬

止故三代皆享國綿遠若此者又何暇于齋醮之祈

禱乎陛下稟仁聖之資當奮大有為之志遠宗堯

舜而上紹商周乃舍經筵之所當習講與祖宗之所以垂訓者不事而顧甘心于秦漢梁宋之故轍亦獨何哉聖人之道永終無敝陛下上法祖宗遠師聖賢勿孤輔臣之忠愛於虛獎必措知道之明旨於躬行自今以後奮然正道之由大黜異端之惑息壇場之勞以凝神於文華之清燕移佛老之拜而留心於師臣之尊禮經筵必勤日講不廢防好色之鴆毒以保身服忠謹之藥石以享年凡近日齋醮之事與供香火之地一切罷革將太監崔文并張銳等餘黨及其他随附蠱惑有名之人逐一查出通閤送法司明正其罪以為奸邪欺罔之戒則

下一轉移之間其幾之察也有復善必速之明  
之決也有改過不吝之勇真大聖人之作為出於  
常萬萬也由是聖道昭明而邪術屏塞群議息於下  
天心享於上治化隆美民物熙皞則聖壽之罔極  
非止於仁聖之所獲而國祚之綿遠不啻與商周同  
其曆矣夫欺蔽蠱惑之禍陛下所知也登極之初  
深究正德類敗之所由首詔拆毀內府佛寺神廟  
并在外玄明經山等項宮祠而下張銳等群奸於臺  
獄此萬代之瞻仰也今不一二年而旋復崇尚其事  
信任其餘奸豈人情乎臣等固知此非出於陛下  
之本心而成之者崔文輩也非其心之所自為而歆

皇明通鑑 卷之二十一  
單絕其事誅逐其人特易易耳伏乞 聖明斷然行之勿為因循勿事姑息則 宗社幸甚天下幸甚臣等職當言路義不容默不勝懇悃激切俟 命之至

禁邪誘以歛 聖福疏

李錫

臣竊觀 先朝群小蠱誘 先帝無所不至幸遇陛下踐祚以來誅竄貶逐奸黨一空死者已矣其生者豈肯帖然於閑散哉其設心積慮將令名下人員投間抵隙以中 陛下之歆者久矣 陛下一中其試則彼之術售而 陛下墮於術中彼之進也不難此類一進必將復試 先朝之毒手再用已慣之奸臣天下國家必至於極敝大壞而後已者天下國家

者可不為寒心也哉邇者中外傳聞以為 陛下曰  
天災示戒 聖體違和及前星未耀塵 聖明之憂  
懷無妄之虞誤中群小之邪術為此齋醮之謬舉

親蒞壇場自行拜禱貢獻賞賚所費不貲光祿寺之  
供用已難內庫之銀兩屢用事屬悖謬物議喧然皆  
以為 經筵 日講 朝廷盛典也部寺大臣及科  
道等官屢屢 請自 退朝後以御之 陛下憚其  
勞而不之聽至此拜禱則不覺其勞給邊賑荒 國  
家大事也部寺大臣及科道等官屢屢 請出內庫  
銀以給之 陛下惜其財而不之聽而至賞賚則不  
惜其費 陛下不勞於所當勞者於此不當勞者反

勞之不費於所當費者於此不當費者反費之豈愛  
正道不如崇邪術保赤子不如寵群小哉臣知陛下  
下之意矣陛下之意豈不曰齋醮此舉可以感天  
地可以致神明可以弭災可以保聖螽斯能羆之慶  
可收果然則不惟陛下欲為臣下皆願陛下為  
之矣顧肯阻此大慶以自異於群小哉但臣讀書有  
年講此已久知此舉無益也故敢昧死為陛下言  
之且陛下之所禱者豈非道教乎豈非佛法乎二  
者誕妄不經載在典籍已往覆轍實今明鑑漢武帝  
嘗事道矣文成五利皆蒙寵幸既而竟覺其非曰天  
下豈有神仙盡妖妄耳惟節食服藥差可少病而已

三利旋被誅夷史稱武帝雄才大略蓋謂其  
其後宋徽宗專事道教迷而不反遂躬繫虜庭竟死  
五國則道之不足信也明矣佛自漢明帝始入中國  
楚王英首崇信之竟被誅殛梁武帝崇信無比餓死  
臺城韓愈佛骨一表其說詳矣則佛之不足信也明  
矣然此舉群小亦自知其無益特假此可以蠱惑  
聖心可以潛移 聖意叨 陛下之寵引黨比之人  
故誘 陛下為之此輩亦曾以此蠱惑 先帝先帝  
竟被其惑卒之 幸豹房蓋新寺遨遊歲月不知止  
極遂至於子道乖於 慈壽夫道戾於 莊肅皇統  
以絕徒爾仙逝詩曰殷鑒不遠在夏后之世 先帝



已誤。陛下豈容再誤也耶。陛下必欲求福亦有  
道矣。書之洪範有曰九五福。一曰壽。二曰富。三曰康  
寧。四曰攸好德。五曰考終命。又曰皇建其有極。欽時  
五福。解之者曰。極者福之本。福者極之效。言君之一  
事一物一言一動無不極其義理之當然。則五福日  
集於身矣。是故堯之福壽多男。本之于峻德。舜之祿  
位名壽。本之于大德。曰峻德。曰大德。建極之謂也。國  
無與不齊。陛下必欲求福。亦建此極而已。然建  
此極。必清心。必寡欲。必節飲食。必慎起居。必公好惡。  
必親儒臣。必遠群小。必經筵。必日講。使親之恭作  
之從。作又視之明。作哲聽之聰。作謀思之睿。作

聖夫如此則德合天地行通神明天災何患乎不  
聖壽何患乎不若堯舜益斯麟趾何患乎不繁衍也  
哉伏望 陛下體洪範之意法堯舜之德監漢以下  
及 先朝之弊大奮乾剛俯從大學士楊廷和等并  
科道等官張翀等所題先將崔文等拏送法司問以  
蠱惑之罪以為群小之戒然後將臣前項所陳一一  
舉行則邪說以杜正道以興多福有自求之益 宗  
社享無疆之休天下幸甚臣愚幸甚

闢異端以隆治化疏

鄭慶雲

往者 聖體屢示違和臣等奏請務學親賢保 聖  
體以慰群望一節實自古帝王祈天永命之本也近

見邸報伏聞於乾清坤寧等宮復開番漢僧經殿  
設齋醮 陛下親臨跪拜行香受籙或永日一舉或  
一日再舉甚至三晝夜通舉名為吉祥好事又於  
乾清宮特令內臣十數輩專一演習經典講究科儀  
豈将以求福田利益邪臣等聞之将疑且憂且畏近  
日遠近聚談皆謂 陛下初無此心盖因太監崔文  
招引先年罪人張銳各名下掌管家人執挾邪術以  
惑 陛下耳且此輩豈真為 陛下求福利邪不  
過乘此以亂聰明以自為權寵計也况佛為教不足  
信乎自古人君信佛之篤而得禍之重者莫如梁武  
帝人臣論佛之詳而見道之明者莫如唐太宗

佛為夷狄之法恠誕不經歷述自古帝王書考  
於反身循理之實而非緣於事佛之故至謂後世事  
佛尤謹享年尤促數語尤後世人臣論佛者之所當  
法也梁武帝之於僧寶誌珍膳廢而不食宗廟廢而  
不享雖其自有之身亦三度舍之而不恤崇信可謂  
至矣卒之侯景臺城之禍佛莫之救此萬世人君事  
佛者之所宜戒也然猶異代不足覽觀先帝遣使  
自蜀西徼外入吐番直至西天迎取活佛以七八年  
之久入萬餘里之深靡費億萬佛亦未有幾成大亂  
而西南遂以虛耗至今悲怨之聲尚猶未息各處創  
建不正淫祠及前王諸王佛子俱經皇上所痛而

親革者也 陛下豈偶忘前日可戒之轍而復蹈之  
耶豈古之帝王為不足法而乃下效梁武帝之所為  
耶不然或以臣等論佛之害未盡明悉而韓愈氏之  
言亦不足信耶此臣等之所未喻也况 宮闈深邃  
地隔塵凡設立醮壇紛紜誦讀誠為溷瀆 陛下以  
萬乘之尊百神之主乃自屬身夷狄之教傳笑天下  
後世光祿寺每日供設費用不貲今民窮財竭正貢  
不給額外何堪誠有如諸臣之所憂者然臣等之憂  
蓋又有甚于此者先儒程頤有言曰人主一心攻之  
者衆故斥有舉動則左右儉壬之徒皆將各挾其術  
日夕窺測以為投間抵隙之地或以女色或以貨利

之意不在此數者

以神仙之求餌以金石之藥教以房帷之邪術

宮觀之興造一竇微開群蠅畢聚人主之于好尚

不謹哉今諸邪者必謂 陛下經筵日廢而禮義之

念幾微 聖體違和而禱祠之說可入萬一 陛下

不悟而輕信之其禍有不可勝言者矣彼小人輩但

知希圖富貴利己為身至於誤君誤國彼又奚恤伏

望 陛下舍已從人反躬思道將大學士楊廷和等

尚書喬宇等科道官張紳屠僑等所奏詳加覽察痛

懲其非速將太監崔文及罪人張銳各名下家人拏

送法司明正其誣上行私之罪祈禱之事再不舉行

習學之人盡行罷去自今以後古訓是師而不惑於異術之支離正人是近而不移于左右之引導清心以寡欲保身以保民則年不祈而壽自永災不禳而福自至矣非惟臣等之幸實天下國家莫大之幸也

亟誅蠱惑遺姦以隆

聖治疏

張翀

竊聞治功難成而易敗邪術易惑而難祛苟辨之不早而去之不力未有不敗其垂成之功而蹈已覆之轍邪正盛衰之分理道得失之判不可不察也 陛下英明神聖追古帝王自入正大統以來凡覆轍之弊不憚更張而治平之望已有端緒頃者 大內之間禱祠繁興上而 乾清坤寧等宮下而東次經

等處或三晝夜或一永日名為吉祥好事修建不  
傳聞宮中以此成俗而又特於 乾清宮令內臣十  
數人專一習學經典講究科儀賞賚逾渥寵幸日密  
夫齋醮之設宜就寺觀之中而顧假之官闈修設之  
徒例用緇黃之流而顧屬之內豎議者皆以先朝罪  
人各名下掌家管事人員自分不逞挾此邪術以為  
嘗試之計而 陛下耳熟諂諛之言心遊老釋之教  
不覺墮其愚弄曲奉淫誣親蒞壇場不以為異流聞  
四方播傳後世使 陛下負奉道之謗蒙好佛之名  
太監崔文等之罪固有不容於死者矣近該大學士  
楊廷和等題為慎選左右速停齋醮以光 聖德事



極言虛誕誣罔利害望 陛下特命司禮監官查出  
蠱惑誘引人員從重究治并黃緣阿附之黨盡為斥  
逐更欲 陛下日以敬 天法 祖修德保身為先  
務廷和等腹心大臣義均休戚其為慮甚遠其為  
陛下甚忠伏讀批答 旨意僅云覽卿等所言具見  
忠愛朕已知道了而前項蠱惑阿附之徒置之不問  
則耳旬日重疑人心夫去不善而不能遠大學之所  
謂過也知惡而不能去郭公之所以亡也往年小人  
焦寧吳亮輩寔挾此術以誤 先朝殷鑒不遠殊為  
可惡茲復踵其故智上累 聖德使 陛下不知其  
非則亦已矣知之而猶惑於其說昵於其人彼必以

為崇尚之深非物議之所能搖愈肆奸欺凡以中  
陛下之欲者無所不至因而干撓政事牽復群邪傷  
太平之業失四海之望其為可慮不但一節一目小  
小虧損而已也切計今日寧遠君子而不忍斥其徒  
寧畧人言而不欲違其教亦以倡此說者皆謂聖  
明一心敬信可以延年可以已疾交謹不已用堅  
上心而不知神慮淡則血氣和嗜慾勝則疾疹作古  
之聖帝明王深懼尤物之滅周女戎之敗晉慎之遠  
之福慶用昌正不必過崇妖妄以徒事無益之請也  
昔宋太祖嘗問養身之術而王昭素以寡慾為先真  
德秀進言於理宗以親賢為致壽之道昭素之言詞

約意盡而德秀之論懇切詳明其意以卷阿寔召康公廣砥心之詩既曰爾受命長矣第祿爾康矣而繼之以有孝有德以引以翼何者情慾易惑德性易移近妃嬪褻御之時多而親學士大夫之時少則逢迎扇惑罔辨物慾豈惟敗德抑以傷生惟有孝有德者以引之而前而翼之於後則日聞正言日見正論其心恬淡而和平其體優游而泮渙保身長世之道要不出於此者臣等側聞頃來嬪御女謁充積閨帷而其間一二人者號為黠慧柔曼為惑尤甚是怠於日講疏於經筵一切施行漸多頗僻葆養愆度時見和小人窺見間隙遂以前項左道上逆

聖意

無所忌夫以齋醮為足恃而恣無已之欲於宮壺之間以荒淫為無傷而要難必之福於夷狄之術講筵一暴而十寒引翼日疏而月遠甚非古之帝王所以求福不回親賢保身之道也伏願 陛下思祖構之艱難恤人言之旁午深察邪正之辨深採理亂之歸亟從廷和等所謂先將崔文并 樣蠱惑誘引人員賁緣阿附表裏售奸之黨通行拏送法司明正其罪尤望日御 講筵以親道德之士日謹閨闈以塞情竇之非或古今治亂人心向背務嚴包桑之戒而咨諏之益詳或鷄鳴淑女厲階婦人務慎貫魚之寵而取舍之有定如此庶幾道體不奪於人心剛德不撓

皇明通鑑 卷之十一  
於彙昵有以養性情之正有以培壽命之源政治光  
於祖宗而名壽加於堯舜區區齋醮之舉無益有  
損宜無足置之牙頰者矣

除邪類以建皇極疏

劉世揚

伏觀陛下臨御以來勵精圖治頃因天變警懼  
修省停罷齋醮及一應興造不急之務中外臣工勉  
承休德天下引領想望太平皆謂雖前之舉措間有  
差失猶幸聖心未為邪誘或可因而施啓沃輔助  
之益耳乃者何過惑太監崔文等妖妄之說大興異  
教各宮彌日開建齋壇修齋誦經內外供具糜費  
不貲天子臨拜謂之好事又有漢靈厭西天經厭

靈濟宮顯靈宮等處修設上下傳降中外扇誘以為  
福利噫此何等事實誌公徐知常王老志欺君誤國  
之故智梁武帝宋徽宗臺城南渡之覆轍謂陛下  
甘心乎竊痛恨陛下此心為異端邪妄所引去恐  
自此天下之事不可為矣夫聖人參於天地並於鬼  
神以致治也釋老之教不見於堯舜禹湯文武之世  
而後稱聖明稱治平者必曰唐虞曰三代在昔聖人  
之致治蓋可見矣書洪範皇極曰皇建其有極歛時  
五福用敷錫厥庶民夫聖人所建立標準為四方之  
所取正者亦惟盡人倫安義理體信達順以集福于  
上使天下觀感而化會極歸極以敷錫福于下無他

道也故曰壽曰富曰康寧曰攸好德曰考終命謂之  
五福曰凶短折曰疾曰憂曰貧曰惡曰弱謂之六極  
說者謂五福六極在君係於極之建不建在民係於  
訓之行不行禍福從來斷可知矣今棄彛倫而崇異  
教惑邪說而背正道持此以求福壽康寧攸好德考  
終命之事豈不其遠矣哉夫以天子之尊而躬拜  
釋老之場以天地神人之主而動心冥福之及此  
不過使後笑今猶今笑昔而已矣且彌勒釋迦輪迴  
管世天尊神將驅魔降祐此閭閻山野愚鄙所為轉  
相誑誘積久成習遂假以號召無賴群聚為寇  
賊奸宄每自此始况天子法官躬自下門

風翕然並起。民無知鼓倡。易從此奸宄之資。視  
之本也。故我太祖高皇帝大誥深惡愚民。念誦  
無彌勒尊佛。以為六字。謂之造禍。又戒今後良民。凡  
有六字。即時燒毀。毋存。毋奉。永保已安我太祖真  
皇極之君也。謂此六字為造禍。歆燒毀六字以保安  
異乎。崔文等之所謂造福保安矣。故祖訓一條。開  
載庵觀寺院燒香降香。禳告星斗。已有禁律。違者及  
領香送物者。皆處以死。然則我太祖之律令嚴矣。  
其見理甚精。而慮患甚遠。故著之祖訓。與聖子  
神孫。世世守之。今崔文等及先朝壞法亂政。名下  
掌家管家。未殄之徒。交引朋比。習學異教。欺誑陛



下扇惑中外搖動人心糜大官大貳之財紊初紀清明之政臣以為今日宜遵祖訓處崔文以死并究其黨及表裏扇引領香送物之人咸治無赦仍頒降勅諭布告中外以破群惑以塞禍源惟陛下遠監古昔近遵聖祖上畏天命下卹人言斷在必行則宗社幸甚然崔文等今日所以敢為是欺誑而不顧者良由先朝奸黨吳毫焦寧等陛下治之未正其罪耳此二人者勾引番僧符同劉允愚弄先帝齋送番供奉討鹽茶遠涉烏思藏迎來活佛騷擾天下耗糜百萬及陛下詔取回京群奸伏罪而允止降詔間住亮寧止發遣籍沒顧得保全首領侍

適天誅此崔文等今日之所以肆行無忌也然前  
允等陛下猶能暴其蠱惑誘引欺君誤國之  
罪而罰治之今崔文等朋奸邪類違祖訓法所不  
赦大小之臣連章累牘發其罪狀陛下乃曲為庇  
護不蒙顯戮是縱使為奸何所不至矣先帝以吳  
亮焦寧而不得善其終陛下以崔文而不得正其  
始前車既覆後車不監旁觀有見當局則迷臣竊為  
陛下痛之惜之伏望大奮乾剛亟為殄絕使宮  
闈之內肅肅雍雍廓然一清異教既熄邪類既除則  
侍御僕從罔非正人出入起居罔有不欽而陛下  
一意崇儒重道日御經筵虛受日講為涵養薰

陶之助如洪範所謂視明作哲聽聰作謀言從作乂  
貌恭作肅思睿作聖之五者敬事無替使嗜慾寡禮  
樂備敬義立而身脩 內令嚴而家齊 陛下所以  
盡倫理建 皇極以感化天下端在是矣故建極則  
福集於上而有壽富康寧攸好德考終命之美天下  
化則福錫於下而無凶短折疾憂貧惡弱之禍故雨  
暘燠寒風五者各徵於五事而以其敘而百穀用成  
庶民乂安至此則天地自位萬物自育諸福之物可  
致之祥莫不畢至此之謂好事謂吉祥謂一人有慶  
兆民賴之故號曰皇極之世此堯舜禹湯文武之所  
以治天下者 陛下誠有見乎此則彼之區區具端

邪說徼求福利符呪經偈警動小術祇見其幻且妄而無所用之矣夫義理明則妖妄難惑志向定則他岐莫移不然今日陛下雖勉強聽納俯賜施行而真知未開立志未定恐他日又未必無崔文如今日崔文之為吳亮焦寧也此又愚臣區區芹曝之願為宗社億萬年無疆之休者伏惟陛下憲天聰明而廣納焉臣無任恐悚待罪之至

黜異端懲小人以隆聖道疏

安磐

臣聞所謂異端者非聖人之道而別為一端如禱祠功利之說皆是故孔子曰攻乎異端斯害也已後世佛老之害為甚而佛氏之害為最甚神虛無寂滅之

術售生死輪迴之說派而為懺為齋為醮為青詞為道場為法事其徒漫以糊口者非二氏本旨也東漢以來奉佛者身之禍福國之安危年之修短唐臣韓愈論之甚詳近日大學士楊廷和等兼以徽宗事言之又甚切 陛下可覆而視臣不敢贅惟事近可鑒者莫如 武宗皇帝敢昧死一言 陛下試垂聽焉武宗初年亦嘗留心講學矣二三年後遂為左右惑即從事內典內典既習即從事番教於是鎖南經吉出入豹房矣番教既諳即從事取佛於是太監劉允驅馳西域矣十數年間 武宗或胡帽或紫衣或持呪或結印往往傳播民間番教無資於祈禱西佛

未見其蹤跡糜費大官流謗道路二者 武宗實恨  
焉此 陛下之所聞見者旣而劉允放而鎖南囚天  
下頌 陛下之明正道復而異端息天下頌 陛下  
之聖供億減而光祿裕天下頌 陛下之儉 宮掖  
清而小人伏天下頌 陛下之英數者斯 陛下之  
所以垂譽無窮者也柰何甫及二年遽襲故轍不齋  
則醺月無虛日哉 陛下聰明絕出所以掃除二氏  
之害人其人火其書者天下方屬意而崇尚反舛戾  
若此臣愚何望焉然非 陛下本意太監崔文等為  
之也謹按崔文本以鍾鼓廝役寅緣 青宮用事冒  
陞太監幸 陛下降革邇來營求遂還舊官今復導

陛下以此使陛下失其所謂明喪其所謂聖忘其所謂儉損其所謂英取笑天下貽譏後來者皆文為之臣謂文可斬也文之意以嘗試陛下也陛下既為所動欲行香則行香欲登壇則登壇欲拜疏則拜疏臣恐無已則導以聲色無已則導以貨利無已則導以遊幸則導以土木則導以征伐文以漸致也諸餘如文者又將牽類伺便求所意欲逞也陛下德同堯舜而文敢如此左道面欺朋黨紊亂故曰文可斬也望陛下不憚改過翻然悔悟將崔文等拿送法司治以重刑掃迹經壇以塞禍源一意講學

訪儒臣庶理明而邪說不得干譏特而小人不能

眩 恩可遠施 澤可一施以之祈天永命其於功  
効與奉彼二氏者相萬也天下臣民拭目傾耳決安  
危之機在此一舉伏惟 留意

除邪妄以彰 聖化疏

夏言

比者恭遇 皇上詔及群臣欲除去禁中釋殿奉建  
兩宮以備一代之制一時廷議翕然仰贊 皇上篤  
養盡制之孝闢邪崇正之化 盛德大業光前振後  
矣今月十一日伏奉 聖旨命大學士臣李時同臣  
言入看即所謂大善殿者臣等看得殿內有金銀鑄  
像鉅細不下千百且多夷鬼淫褻之狀仰惟 聖明  
燭其誕妄不經一旦奮然舉而除之甚盛舉也但臣



見諸几案之上及懸度梁拱之間與夫金函之所藏貯者為物尚多不可識辨問之守者且云是為佛骨是為佛牙枯朽摧裂奇離殞礪計不下千斤臣惟佛法之入中國自漢明帝時始然不過人誦其書習其教而已至唐憲宗朝乃迎佛骨至京師其臣韓愈上表極言其邪穢不祥不宜以入宮禁憲宗不能聽且深罪愈竟遠斥之臣意自是厥後人莫敢矯其非凡番夷持以誑惑中國之人而名為佛顧佛骨者相屬於道由是流入天子宫禁之內歷世皆然而不以為異今殿中所有未必非勝國所遺累朝以來亦必以為彼法則然未嘗深究以延至今茲者恭惟 皇

上聖堯舜禹湯文武之資行堯舜禹湯文武之  
始議徹佛屋毀除穢像使詭異之形不得瀆留  
禁此真卓越千古之見出於尋常萬萬者也然  
像設旣除所有前項佛骨佛牙之類皆屬污穢不  
使之尚存臣請乞以此物勅下所司瘞之草野  
一切掃而淨之以永杜愚冥疑惑之端實為大聖  
人非常作為有補名教甚大功德罔極臣不勝幸甚  
後世幸甚緣係除邪妄以彰聖化事理未敢擅便  
謹題請 旨

崇正黜邪以隆

聖治疏

史梧

竊惟帝王所以遵天下之幾不可一事少試於權奸

之巧而其所以主天下之心不可一毫稍違乎道義之臣臣等伏覩 陛下登極之初 詔毀添蓋佛寺神廟石經山祠而法王佛子國師禪師盡行查革凡所為類矯 武廟故事直欲追唐虞而上之今不載蒼廼有邸報如壇場齋醮之設大小廷臣所疏者是武廟前日之所為而今復為之 陛下之昔以為非而今顧其以為是而行之耶夫天人禍福之幾之不可微幻誕妄誣之妖之不可信大學士楊廷和給事中張源御史屠僑等蓋已連章累疏援古證今互攻其謬無餘說矣臣等不容復贅矣臣等惟謂天下之理有是非之分邪正之對是非邪正之所以相勝

其幾每決於人主好尚之微不可以不審也今乃指  
佛為非目佛為邪匹夫愚民而皆辨之豈有人主德  
高天下而智獨屈於匹夫之愚也特壽夭禍福之疑  
有以奪之焉耳夫禍福一出於天夫人而皆辨之豈  
有人主為天之子而獨不悟也特不勝左右群枉之  
讒焉耳左右之事其君者亦豈不知帝王萬乘之尊  
而錯聽於削髮涅槃之說貽笑中外也但彼之良心  
斲喪焉耳彼之良心斲喪之欲眩其君者先之以壽  
夭禍福之說以售其似忠似愛之姦繼之終之凡可  
以蠱惑君心而逞彼之便者無所不至矣由此觀之  
則今日齋醮之設亦安知非 陛下主一無二之心

誤旁落於權姦之試也哉臣等聞之深為 陛下惜  
亦深為 陛下懼也况王道異端勢不兩立 朝廷  
之所作為天下臣民之所趨嚮千百年道統正脉之  
所繫不可不慎也夫既以身繫天下臣民之所趨嚮  
則上有好而下必有甚焉者矣 陛下為天下生民  
主亦肯率天下之人而歸於無父無君之教也哉既  
以身繫千百年道統之重則有今日浮屠之說其誰  
啓之 陛下亦甘暫釋道統之傳而坐百年之後壞  
道之議也哉臣願 陛下重思之也王者之度如天  
地之無心揆之理而順則行稍有違焉則改 陛下  
今日之所為以為順耶則何以來廷臣之所論

如是者以為違耶則何不改其違以歸於正而後  
朝無異議天下依然共仰日月之明也耶臣等所  
以共為陛下爭也然臣等論列至此終不甘心於  
左右妖妄之言復毅然堅執一說以勝之請為陛  
下終之夫左右之言佛不過曰佛能養壽命之源佛  
能造天下之福也臣等則以為養壽命之源不在於  
佛而在於講學養身造天下之福不在於佛而在於  
遏彊扶弱養壽命之源不在於佛而在於節慾順理  
造天下之福不在於佛而在於信任君子屏斥小人  
邇者經筵之講暫御復釋何有於講學養身復  
聞聲色之邇過而不節何有於節欲順理主事羅洪

載罪遭慘刻是以一百戶之故中傷手足也何有於  
遏彊扶弱事關大體不由內閣尚書林俊呼斥回話  
而崔文之姦固結不去何有於信任君子屏斥小人  
不知是而徒佛老焉齋醮焉使大臣解體小臣離德  
陛下亦何便哉臣願陛下遵崇正道講學養身信  
任君子屏斥小人速罷齋醮之舉求夫倡言之人而  
重治之佛像盡行燒燬僧道盡行屏逐將其蠱惑之  
甚者與崔文明置典刑仍乞勅禮部嚴絕僧道內  
侍往來之路以杜媚竈由徑之漸其有僧不循禮法  
潛使養髮之徒出入內侍衙門希圖賄賂漸要恩  
寵者即送法司拏問則王道明而異端去矣

關左道以術 聖化疏

鄭一鵬

臣聞易之節曰節以制度不傷財不害民禮左道惑衆者必誅無赦春秋辨華夷中國而夷狄則夷之故杞侯用夷禮則貶而稱子惡用夷也恭惟 皇帝陛下聰明恭儉出於天性自 臨御以來汰冗省費蠲租青邑一切無名寺觀輒弛以利民其於好惡節儉之慎古帝王莫能尚矣近該臣巡視光祿觀正德十六年五月以來欽錄簿者知 宮中用度之節目常膳之外少有所取比年以來禱祀繁興調度彌廣有乾清宮好事有 坤寧宮好事有 清寧宮好事有 西天西番漢經廠好事有 五花宮好事有 乾清



宮西煖殿 坤寧宮東次間好事有學習道經日給茶飯者如此之類或三晝夜或一永日或間日一舉或一日再舉 經筵供具日虛設而無所用夫以

陛下明聖可為堯舜禹湯文武之資不以古之聖帝明王自期日事釋老之教不親儒生師古訓日以脩齋誦經為事傷太平之業失天下之望莫此為甚臣愚以為此輩挾此術進者必皆魏彬張銳之餘黨曩持此術以欺 先帝使生民塗炭海內虛耗至今莫可藥救臣謂此輩一日在 宮中則貽一日之害

先帝已誤 陛下豈容再誤願 陛下亟誅之遠之今朝野嗷嗷咸謂 經筵既疎則忠良正直之士日

建道場既盛則番僧寺觀之事日興雖

聖明在上

決無此事而履霜堅冰可不寒心哉臣嘗散錢糧每

一齋醮豆腐麪筋用錢萬八千有餘以日計之所費

不知其幾十萬以月計之不知其幾百萬陛下頃

因天戒停止齋醮知其費財無益明矣而宮中

猶為之者豈非左右以福田利益之說欺陛下也

邪臣請為陛下陳之夫佛者夷狄之一法耳其生

死於夷言語侏儻不通中國假使來王不過當陛下

下一見賜之酒飯而已今既化之鬼乃崇信而尊

尚之不取輕於夷者幾希且王者父事天母事地岳

瀆視公侯中外無文之神靡所弗統今舉夷狄之神

祀之 宮中勞民費財為禱祀之具其拂經悖禮孰

甚焉且古之帝王享祿位名壽全福者莫如堯舜禹

湯文武堯壽一百十有六歲舜壽百有十歲禹湯壽

百歲文王壽九十七歲武王壽九十三歲當時未聞

有佛也考其為治曰嘉言罔攸伏稽衆舍已野無遺

賢不虐無告不廢國窮又曰勅天之命惟時惟幾曰

聲脩人紀從諫弗拂先民時若不邇聲色不殖貨利

曰微柔懿恭惠鮮鰥寡懷保小民自朝至晏不遑暇

食其為戒曰儆戒無虞罔失法度罔遊于逸罔淫于

樂任賢勿貳去邪勿疑罔違道以干百姓之譽罔拂

百姓以從已之欲又曰內作色荒外作禽荒甘酒嗜

色

音峻宇雕牆有一於此未或不亡又曰恒舞于宮  
歌于室時謂巫風殉貨色恒遊畋時謂淫風侮聖  
逆忠直遠耆德比頑童時謂亂風又曰生則逸不知  
稼穡之艱難不聞小人之依又曰黷于祭祀時謂弗  
欽禮煩則亂事神則難未聞有禱祀之說也當時百  
僚師師萬邦咸寧鳥獸魚鼈咸若天下言治者莫加  
焉漢文帝迎佛於天竺而佛始至中國梁武帝信浮  
屠三舍身為奴又講佛經于同泰寺臺城之變遂至  
亡國唐憲宗迎佛骨而唐業衰宋徽宗惑徐知常王  
老志林靈素作千道會班金錄道場于天下自謂教  
主道君言路壅塞恩倖持權遂成靖康之禍自有傳

以來事佛得禍者有之未有事佛得福也書曰與治同道罔不興與亂同事罔不亡終始慎厥與惟明明后 陛下上嘉下樂動以堯舜禹湯文武為法詎肯蹈梁武唐憲宋徽之覆轍乎方今天災時變月無正報京師之民苦於賦繁役重有鬻賣妻子者有無衣裹席行乞者有母子五六裸而餓餒者州縣則徵法煩擾仍以饑饉窮者轉而為盜賊其良者往往廢燬於兵刃邊境之民日夜望燧荷戈而不得食此其為難哉景公店欲誅祝史晏嬰諫曰雖善祝豈勝一萬人之詛君欲誅祝史修德而後可景公說命有言寬政薄斂責已景公遂愈 陛下以為公之

民怨耶樂耶

天地

祖宗之付託兆民之望

宜如此雖有忠言讜論往往以已有旨却之恐斂民

怨不忍傷佞倖之心恐拂元臣弼士之諫不忍違寺

僧之請此愚臣所未解者也

陛下勿以民怨為不

足懼秦末民怨矣勝廣起漢末民怨矣黃巾起唐宋

末民怨矣黃巢金元熾書曰不見是圖又曰民可近

不可下可不懼哉臣願

陛下思

天地付託之重

念祖宗創守之艱以民怨為必可畏以人言為必

可恤時御

經筵召儒臣咨諏善道

召大臣諫臣

察納雅言清心省事為靜養君德之基節用愛人為

深固邦本之計伏願改西天殿為寶訓殿

祖宗御

製諸書盡貯其中西番廠為古訓廠五經諸子書盡貯其中漢經廠為聽納廠諸臣奏疏盡貯其中令司禮監同大學士楊廷和等共選內臣知義禮小心畏慎者司其鎖鑰 陛下經筵之暇朝夕游息其中凡誦習道經者盡數逐出無使左道夷狄之教得以熒惑 聖聰則壽何以不若堯舜禹湯文武治何以不若唐虞三代哉

決 聖意以毀佛像疏

朱演

臣竊惟大君者天之宗子精神意氣相為感通君之所為以天之心為心天必默相以順成其美以決其

年歲豐稔此皆

陛下聖德隆盛禮教休明之徵應

也即今大興隆寺火災之故臣又有以驗陛下之

驅斥佛教深有契乎天心天固默相乎陛下以

順成乎此志然耳夫佛本夷狄之教非聖人之法自

漢以上未之有也明帝之時始入中國嗣是以來漸

崇信之乃聽其宏殿峻宇雕梁畫棟圖形塑像繪彩

泥金群聚天下淪沒三綱之人而養之惑世誣民

耗財蠹政莫此為甚唐臣韓愈佛骨一表闢之甚詳

凡少知義理者無不知其為非然流傳既久因循成

俗卒未有能盡除之者此豈天之心乎恭惟皇上

慨百世之沉迷洗千古之陋習乃命京師內外毀



寺宇汰僧尼申

勅天下臣工勸諭僧人還俗將以

漸除之以挽回天下於三代之隆此何心哉 天之

心也 陛下以 天之心為心 天之所以感契乎

陛下者諒無不至矣臣故於今大興隆寺之火有以

驗其然也蓋 陛下前日之獨存此寺者非謂其有

益於治而存之也蓋曰姑存之漸以圖之耳則盡其

教而除之者 陛下之意也夫先師孔子之像 臣

下謂非禮之所宜亟 詔去之天下始而駭然終而

愈然信而安之以為 陛下見高千古意出百王真

是以垂訓萬世也則盡去佛像以息異端以崇正道

陛下之有是心也久且切矣今者之火并其

佛像所居之殿宇而煨燼之 天於佛像示可  
蓋默契 陛下之心而順成之云爾夫此寺者天下  
之寺之宗示毀于此則天下之寺之佛像之當毀也  
可知矣臣聞天下之事得其機則易於為力欲息天  
下之佛教當必先毀天下之佛像蓋毀佛像者王化  
之機也伏望 陛下仰承 上天順成之意俯察王  
化易行之機降 勅禮部申明禁約頒布天下凡各  
寺院一切佛像悉令毀之投諸水火永絕根源則僧  
人不必逐也夫其所依彼將自散迨數十年天下將  
不失其所謂佛者耶使天下後世曉然知大聖人之  
所作為有出於尋常萬萬者又不在此舉耶世之感

于其說者謂佛有靈弗可毀也其果靈耶何不自庇其身而一朝煨燼之如此則其說之不足信也明矣如其有靈能為禍患臣請以身當之臣又觀夫大興隆寺之基地甚開廣仍乞勅禮部從長集議或將此寺改為習儀祝聖之處庶近且便於禮似亦相宜臣待罪言官久慙徒祿攄一得之愚報萬分之一臣之分也亦臣之心也仰惟陛下為道統立的為生民立命為萬世開太平其佛氏也如韓愈所謂人其人火其書廬其居者端有在于今日臣無任戰慄之至